

সপ্তম ভাগ
নির্বাচন কমিটি, নির্বাচন ও শপথ (বা ঘোষণা)-পাঠ
১ম পরিচ্ছেদ- নির্বাচন কমিটি

৬৮। নির্বাচন কমিটি নিয়োগ : (১) দফা (২) অনুযায়ী নির্বাচন কমিটি নিয়োগের জন্য সমিতির ব্যবস্থাপনা কমিটি এবং ক্ষেত্রমত অন্তর্ভুক্তি ব্যবস্থাপনা কমিটি, সাধারণ সভা ও নির্বাচন অনুষ্ঠানের ৪৫ (পঁয়তাল্লিশ) দিন আগে নিবন্ধকের বরাবরে লিখিত অনুরোধ জানাবেন।

(২) ব্যবস্থাপনা কমিটির নির্বাচন অনুষ্ঠানের কমপক্ষে ৪০ (চল্লিশ) দিন আগে নিবন্ধক- সরকারি কর্মকর্তা কিংবা তাঁর বিবেচনায় উপযুক্ত বলে বিবেচিত ব্যক্তিদের সমন্বয়ে ৩ (তিন) সদস্যবিশিষ্ট একটি 'নির্বাচন কমিটি' নিয়োগ করবেন। [সমবায় সমিতি বিধিমালার ২৬(২) বিধি মোতাবেক- যে-সকল প্রাথমিক সমবায় সমিতির পরিশোধিত শেয়ার মূলধন ৮৫০,০০০/- (টাকা পঞ্চাশ হাজার মাত্র) উর্ধ্বে সে-সকল প্রাথমিক সমবায় সমিতির নির্বাচন কমিটি- নিবন্ধক কর্তৃক উক্তরূপে নিয়োপ্রাপ্ত হবে। উল্লেখ্য, বৃত্ত সমবায় সমিতি একটি প্রাথমিক সমবায় সমিতি। একই বিধিমালার ২৬(৩) বিধি মোতাবেক পরিশোধিত শেয়ার মূলধন ৮৫০,০০০/- (টাকা পঞ্চাশ হাজার মাত্র) পর্যন্ত হলে, নির্বাচন অনুষ্ঠানের ৪০ (চল্লিশ) দিন আগে সমিতির ব্যবস্থাপনা কমিটি কর্তৃক 'নির্বাচন কমিটি' গঠন করতে হবে।]

(৩) নির্বাচন কমিটির কোন পদ শূন্য হলে নির্বাচন কমিটি গঠনের এখতিয়ার সম্পন্ন কর্তৃপক্ষ, ক্ষেত্রমতে নিবন্ধক অথবা ব্যবস্থাপনা কমিটি, কর্তৃক অবিলম্বে তা পূরণ করতে হবে।

(৪) নির্বাচন কমিটির সভাপতিসহ সদস্যগণ নির্বাচন অনুষ্ঠানের দায়িত্ব পালনের জন্য সমিতির তহবিল হতে উপযুক্ত পরিমাণ সম্মানী ভাতা পাবেন।

৬৯। নির্বাচন কমিটির কার্যাবলি : (১) নির্বাচন কমিটি নির্বাচন অনুষ্ঠানের অনূন ৩০ (ত্রিশ) দিন আগে নিববর্ণিত বিষয় উল্লেখপূর্বক নির্বাচনী তফসিল ঘোষণা করবে; যথা-

- (ক) মনোনয়নপত্র প্রাপ্তির স্থান, তারিখ ও সময়;
 - (খ) মনোনয়নপত্র দাখিলের তারিখ, সময় ও স্থান;
 - (গ) মনোনয়নপত্র বাছাই করার এবং বাছাই শেষে প্রার্থীর প্রাথমিক খসড়া তালিকা প্রকাশের তারিখ, সময় ও স্থান;
 - (ঘ) প্রাথমিক খসড়া তালিকায় অন্তর্ভুক্ত কোন প্রার্থীর মনোনয়নপত্রের বিষয়ে আপত্তি কিংবা বাতিলকৃত প্রার্থীর আপিল আবেদন দাখিলের তারিখ, সময় ও স্থান;
 - (ঙ) আপিল শুনানির সময়কাল, স্থান ও শুনানি শেষে চূড়ান্তভাবে বৈধ প্রার্থীর তালিকা প্রকাশ।
 - (চ) প্রার্থীতা প্রত্যাহারের শেষ তারিখ, সময় ও স্থান;
 - (ছ) ভোট গ্রহণের স্থান, তারিখ ও সময় এবং
 - (জ) নির্বাচন কমিটি কর্তৃক চাহিত এবং প্রার্থী কর্তৃক মনোনয়নপত্রের সংগে দাখিলযোগ্য প্রয়োজনীয় দলিলাদির বিবরণ এবং মনোনয়নপত্র দাখিলের নিয়মাবলি।
- (২) নির্বাচন কমিটি নির্ধারিত তারিখ ও সময়ে নির্ধারিত স্থানে -
- (ক) প্রার্থী কিংবা তার প্রতিনিধি কর্তৃক দাখিলকৃত মনোনয়নপত্র জমা নিবেন;
 - (খ) প্রার্থী বা তার মনোনীত প্রতিনিধির উপস্থিতিতে মনোনয়নপত্র বাছাই করবেন;
 - (গ) বাছাই অন্তে বৈধ এবং বাতিলকৃত প্রার্থীর নামের তালিকা প্রকাশ করবেন এবং
 - (ঘ) বৈধ প্রতিদ্বন্দ্বী প্রার্থীগণের মধ্যে প্রতীক বিতরণ করবেন, একাধিক প্রার্থী একই প্রতীক দাবি করিলে সংশ্লিষ্ট প্রার্থীগণের সম্মুখে লটারির মাধ্যমে উহা নিষ্পত্তি করবেন এবং উক্ত ফলাফল চূড়ান্ত বলে গণ্য হবে।
 - (৩) নির্বাচন কমিটি নির্বাচন অনুষ্ঠানের জন্য পোলিং অফিসার নিয়োগ করতে পারবেন।

৭০। মনোনয়নপত্র বাতিল ও আপিল : (১) নির্দিষ্ট তারিখ ও সময়ে নির্ধারিত স্থানে মনোনয়নপত্র বাছাইকালে নির্বাচন কমিটি নিবলিখিত ক্ষেত্রে মনোনয়নপত্র বাতিল করতে পারবেন; যথা-

- (ক) গঠনতন্ত্র, আইন, বিধি কিংবা উপ-আইন মোতাবেক যদি প্রার্থীর ব্যবস্থাপনা কমিটির সদস্য হওয়ার যোগ্যতা না থাকে;
- (খ) মনোনয়নপত্রে উল্লিখিত প্রার্থীর নামের সংগে অন্যান্য দলিলাদিতে বর্ণিত নামের অমিল হলে অথবা মনোনয়নপত্র অসম্পূর্ণ, কাটাকাটি কিংবা ঘষামাজা থাকলে;
- (গ) মিথ্যা কিংবা প্রতারণাপূর্ণ তথ্য পরিবেশন করা হলে অথবা নির্বাচন কমিটির চাহিদা মোতাবেক মনোনয়নপত্রের সাথে প্রয়োজনীয় দলিলপত্র সংযুক্ত না করা হয়ে থাকলে এবং

(২) প্রার্থীর দাখিলকৃত মনোনয়নপত্রের সংগে দেয়া তথ্যাদির সঠিকতা যাচাইয়ের জন্য নির্বাচন কমিটি যে কোন উপযুক্ত পদ্ধতি গ্রহণ করতে পারবেন।

(৩) নির্বাচন কমিটি কর্তৃক কোন প্রার্থীর মনোনয়নপত্র বৈধ ঘোষণা কিংবা মনোনয়নপত্র বাতিল বিষয়ে প্রশ্ন দেখা দিলে সংশ্লিষ্ট ব্যক্তি নিবন্ধকের নিকট প্রাথমিক খসড়া তালিকা প্রকাশের ২ (দুই) কর্ম দিবসের মধ্যে আপিল করতে পারবেন। নিবন্ধক সংশ্লিষ্ট পক্ষকে শুনানি প্রদানপূর্বক আপিল আবেদন গ্রহণের ৩ (তিন) কর্ম দিবসের মধ্যে আইন ও বিধি মোতাবেক নিষ্পত্তি করে তার সিদ্ধান্ত

তাৎক্ষণিকভাবে নির্বাচন কমিটিকে অবহিত করবেন এবং উক্ত সিদ্ধান্তের ভিত্তিতে নির্বাচন কমিটি তফসিল মোতাবেক চূড়ান্ত প্রার্থী তালিকা প্রকাশ করবেন। নিবন্ধক নির্বাচন কমিটির দায়িত্ব পালন করলে এ ক্ষেত্রে নিবন্ধকের পরবর্তী উর্ধ্বতন কর্তৃপক্ষের নিকট আপিল করতে হবে। মনোনয়নপত্র বৈধ কিংবা বাতিল বিষয়ে আপিল কর্তৃপক্ষের সিদ্ধান্ত চূড়ান্ত বলে গণ্য হবে।

(৪) ব্যবস্থাপনা কমিটির নির্বাচনে যদি কোন পদে বৈধ কোন প্রার্থী না থাকে, তবে নির্বাচন কমিটি উক্ত প্রার্থীহীন পদসমূহ শূন্য হিসেবে ঘোষণা করবেন। নবনির্বাচিত ব্যবস্থাপনা কমিটি দায়িত্ব গ্রহণের পর উক্ত পদে নির্বাচিত হওয়ার যোগ্য সদস্যকে মনোনীত করে শূন্যপদ পূরণ করবেন।

২য় পরিচ্ছেদ- নির্বাচন

৭১। নির্বাচন সম্পর্কিত সাধারণ বিষয়াবলি : (১) প্রতি তিন বছরান্তর ব্যবস্থাপনা কমিটির নির্বাচন অনুষ্ঠিত হবে।

(২) ব্যবস্থাপনা কমিটির নির্বাচন সাধারণত গোপন ব্যালটের মাধ্যমে হবে।

(৩) নির্বাচন অনুষ্ঠানের লক্ষে আহ্বায়িত সাধারণ সভা অনুষ্ঠানে কোরাম পূর্ণের বাধ্যবাধকতা থাকবে না।

(৪) তফসিলে যদি এমন কিছু উল্লেখ থাকে যা গঠনতন্ত্র পরিপন্থী অথবা গঠনতন্ত্রের সাথে সাংঘর্ষিক তবে তা সরাসরি বাতিল বলে গণ্য হবে। অপর দিকে এমন কিছু অনুল্লেখ থাকে যা গঠনতন্ত্র, সমবায় সমিতি আইন বা বিধিমালায় উল্লেখ আছে তবে তা তফসিলে উল্লিখিত বলে গণ্য হবে।

৭২। সাধারণ ভোটার তালিকা প্রণয়ন : নির্বাচন কমিটি নির্বাচন উপলক্ষে সম্ভব স্বল্প সময়ের মধ্যে নিয়মিত সদস্যগণের সমন্বয়ে একটি চূড়ান্ত ভোটার তালিকা প্রণয়ন করবেন। ভোটার তালিকা সংক্রান্ত যে কোন বিষয়ে নির্বাচন কমিটির সিদ্ধান্ত চূড়ান্ত বলে গণ্য হবে।

৭৩। ব্যবস্থাপনা কমিটির নির্বাচনে প্রার্থীতার যোগ্যতা : সমিতির যে কোন নিয়মিত-সদস্য (৭৪) অনুচ্ছেদের বিধি-বিধান পালন সাপেক্ষে ব্যবস্থাপনা কমিটির যে কোন পদের জন্য প্রার্থী হতে অথবা প্রার্থী হিসেবে মনোনয়ন পত্র দাখিলের যোগ্য বলে বিবেচিত হবেন।

৭৪। ব্যবস্থাপনা কমিটির নির্বাচনে প্রার্থীতার অযোগ্যতা : যদি কোন সদস্য-

(ক) চূড়ান্ত ভোটার তালিকায় নামধারী না হন;

(খ) সমিতির অনিয়মিত সদস্য বা সদস্যপদ স্থগিত আছে এমন সদস্য হন;

(গ) অব্যাহতভাবে কমপক্ষে এক বছরব্যাপী নিয়মিত সদস্য হিসেবে পরিচিত/সদস্যভুক্ত না হন [যদি সমিতিতে প্রার্থী-সদস্যের বয়স কমপক্ষে এক বছর পূর্ণ হয়];

(ঘ) আর্থিক অনিয়মের কারণে সার্ভিস জীবনে কখনো বিভাগীয়ভাবে দণ্ডপ্রাপ্ত হন;

(ঙ) দেশের প্রচলিত নিয়মে ফৌজদারী অপরাধে দোষী সাব্যস্ত হন;

(চ) ঋণ খেলাপি কিংবা দেউলিয়া হিসেবে চিহ্নিত হন;

(ছ) সমিতির বেতনভোগী, সমিতির ঠিকাদার বা লাভজনকভাবে সমিতিকে কোন সামগ্রী সরবরাহকারী সাধারণ-সদস্য হন;

(জ) পরপর তিন বছর অনুষ্ঠিত বার্ষিক সাধারণ সভায় উপস্থিত না থাকেন [যদি সমিতিতে প্রার্থী-সদস্যের বয়স কমপক্ষে তিন বছর পূর্ণ হয়];

(ঝ) গঠনতন্ত্রের ৫৫ অনুচ্ছেদানুযায়ী নির্বাচনে প্রার্থী হওয়ার যোগ্যতা হারান; অথবা

(ঞ) নির্বাচন কমিটির সদস্য হন (বর্তমান/চলমান কমিটির)

তবে ঐ সদস্য নির্বাচনে প্রার্থী হওয়ার অযোগ্য বলে বিবেচিত হবেন।

৭৫। ব্যালট পেপার ও নির্বাচনী সামগ্রী সরবরাহ : ব্যবস্থাপনা কমিটি নির্বাচনের নির্ধারিত তারিখের অনূন ৩ (তিন) দিন আগে প্রত্যেক বৈধ প্রার্থীর প্রতীক চিহ্ন সম্বলিত ব্যালট পেপার, ব্যালট বাস্ক, নির্বাচনী সিল এবং অন্যান্য নির্বাচনী সামগ্রী নির্বাচন কমিটির নিকট সরবরাহ করবে।

৭৬। নির্বাচনে প্রতিদ্বন্দ্বিতা : নির্বাচনী তফসিল মোতাবেক প্রার্থীতা প্রত্যাহারের পর কোন পদে যদি একজন মাত্র বৈধ প্রার্থী থাকে তা হলে নির্বাচন কমিটি উক্ত প্রার্থীকে যথাযথভাবে নির্বাচিত বলে ঘোষণা করবেন। কোন পদে একাধিক বৈধ প্রার্থী থাকলে সেই ক্ষেত্রে নির্বাচন অনুষ্ঠিত হবে।

৭৭। ভোটদান ও ভোট গ্রহণ পদ্ধতি : (১) ভোটার তালিকায় অন্তর্ভুক্ত সদস্যগণ সমিতির ব্যবস্থাপনা কমিটির নির্বাচনে ভোট দিবেন। পোলিং অফিসার বা নির্বাচন কমিটির সদস্য একজন ভোটারের পরিচয় সম্পর্কে নিশ্চিত হয়ে প্রয়োজনীয় সংখ্যক ব্যালট পেপার সরবরাহ করবেন।

(২) ভোট দাতাকে ব্যালট পেপার দেয়ার আগে পোলিং-অফিসার বা নির্বাচন-কর্মকর্তা-

(ক) ভোটার তালিকা ভোটারের নামের পাশে ও ক্রমিক নম্বরে চিহ্ন প্রদান করবেন;

(খ) ব্যালট পেপারের পেছনে দাণ্ডরিক/অফিসিয়াল সিল প্রদান করবেন;

বৃন্দের উপ-আইন/গঠনতন্ত্র

- (গ) ব্যালট পেপারের মুড়িতে দাপ্তরিক/অফিসিয়াল সিল প্রদান করবেন;
- (ঘ) ব্যালট পেপারের মুড়িতে ভোটদাতার স্বাক্ষর গ্রহণ করবেন।
- (ঙ) ভোট আরম্ভ হওয়ার আগ পর্যন্ত দাপ্তরিক/অফিসিয়াল সিলটি নিরাপদ হেফাজতে রাখতে হবে।
- (চ) ভোট প্রদানের নিয়ম/পদ্ধতি না মানলে কোন সদস্যকে ব্যালট পেপার দেয়া যাবে না।
- (ছ) ভোট দাতা ব্যালট পেপার গ্রহণ করে- ভোট প্রদানের নির্ধারিত স্থানে যাবেন। অতঃপর তাঁর পছন্দমত প্রার্থীর প্রতীক চিহ্নের ওপর সিল দিবেন এবং সিল দেয়া ব্যালট পেপার পোলিং অফিসারের সম্মুখে রাখা ব্যালট বাস্ত্বে ফেলবেন।

(৬) ভোটদাতা অন্ধ কিংবা কারো সাহায্য ছাড়া ভোট দানে সক্ষম না হলে নির্বাচন কমিটি তাঁকে সহায়তাদানের জন্য তাঁর মনোনীত কোন ব্যক্তিকে অনুমতি দিবেন এবং উক্ত ভোটদাতা সহায়কের সাহায্যে ভোট প্রদান করবেন।

৭৮। ভোট গণনা ও ফলাফল ঘোষণা : ভোট গ্রহণ শেষ হলে নির্বাচন কমিটি-

- (ক) প্রার্থীগণের কিংবা তাঁদের মনোনীত প্রতিনিধিগণের উপস্থিতিতে (যদি থাকেন) ব্যালট পেপারগুলো ব্যালট বাস্ত্বে হতে বের করে গণনা করবেন এবং নষ্ট, বাতিল কিংবা অস্পষ্ট ব্যালট পেপারগুলো বৈধ ব্যালট পেপারগুলো হতে পৃথক করবেন, কোন ব্যালট পেপার বৈধ কি অবৈধ সে সম্পর্কে নির্বাচন কমিটি সিদ্ধান্ত চূড়ান্ত বলে গণ্য হবে।
- (খ) কোন প্রার্থীর পক্ষে কত ভোট পড়েছে তা পৃথকভাবে গণনা করবেন এবং প্রয়োজনবোধে উহা পুনঃ গণনা করবেন।
- (ক) সর্বাধিক ভোটপ্রাপ্ত প্রার্থীকে নির্বাচিত বলে ঘোষণা করবেন এবং দুই বা ততোধিক প্রার্থীর পক্ষে সমান ভোট প্রাপ্ত হলে, নির্বাচন কমিটি লটারির মাধ্যমে ফলাফল চূড়ান্ত করবেন।
- (খ) নির্বাচনী ফলাফল ঘোষণায় নির্বাচন কমিটির সিদ্ধান্তই চূড়ান্ত বলে গণ্য হবে।
- (গ) নির্বাচন অনুষ্ঠানের আগে বিরোধ মামলা দায়ের করা যাবে না, তবে নির্বাচনী ফলাফল ঘোষণার পর নির্বাচনী ফলাফলে সংক্ষুব্ধপক্ষ ক্ষমতাপ্রাপ্ত কর্তৃপক্ষের নিকট সমবায় সমিতি আইনের ধারা ৫০ মোতাবেক আবেদন করতে পারবেন।
- (ঘ) নির্বাচন কমিটির সকল সদস্যের স্বাক্ষরিত নির্বাচনী ফলাফল নির্বাচন কমিটির সভাপতি সমিতির সভাপতি বা নির্বাহী কর্মকর্তা, বিজয়ী সদস্য এবং নিবন্ধকের নিকট দাখিল করিবেন।

৭৯। নির্বাচন কমিটির কার্যাবলির রেকর্ড সংরক্ষণ : (১) নির্বাচন কমিটি কর্তৃক উহার বিভিন্ন সভার কার্যবিবরণী সদস্যগণের স্বাক্ষরসহ পৃথক রেজিস্ট্রার বহিতে সংরক্ষণ করবেন।

(২) ভোট গ্রহণ শেষে সমস্ত মনোনয়নপত্র, ব্যালট পেপার, কাউন্টার ফয়েল, বৈধ, অবৈধ, বাতিলকৃত ও অব্যবহৃত ব্যালট পেপারসমূহ এবং নির্বাচন কমিটির স্বাক্ষরিত নির্বাচনী ফলাফল, রেজিস্ট্রার বহিতে লিপিবদ্ধ করে পৃথকভাবে সিলগালা লাগিয়ে সমিতির সভাপতি কিংবা সম্পাদকের নিকট বুঝিয়া দিবেন এবং প্রাপ্তি স্বীকারোক্তি হিসেবে রেজিস্ট্রার বহিতে তার স্বাক্ষর গ্রহণ করবেন।

৩য় পরিচ্ছেদ- শপথ (বা ঘোষণা)-পাঠ সংশ্লিষ্ট বিষয়াবলি

৮০। শপথ (বা ঘোষণা)-পাঠ সংশ্লিষ্ট সাধারণ নিয়মাবলি : (১) ব্যবস্থাপনা কমিটি, নির্বাচন কমিটি (যদি সমিতির সদস্য হন) এবং উপকমিটিসমূহের সদস্য পদে নির্বাচিত বা নিযুক্ত ব্যক্তি কার্যভার গ্রহণের পূর্বে ৮১ অনুচ্ছেদ-অনুযায়ী শপথ বা ঘোষণা-পাঠ (সংক্ষেপে “শপথ” বলে অভিহিত) করবেন এবং অনুরূপ শপথপত্র বা ঘোষণাপত্রে স্বাক্ষরদান করবেন।

(২) এ গঠনতন্ত্রের অধীন যে ক্ষেত্রে কোন ব্যক্তির পক্ষে কার্যভার গ্রহণের আগে শপথ গ্রহণ আবশ্যিক, সে ক্ষেত্রে শপথ গ্রহণের অব্যবহিত পর তিনি কার্যভার গ্রহণ করেছেন বলে গণ্য হবে।

(৩) যে কোন কমিটির সদস্য/কর্মকর্তার সদস্যপদ শূন্য হবে, যদি সংশ্লিষ্ট ব্যক্তি শপথ গ্রহণের নির্ধারিত তারিখের পর ত্রিশ দিনের মধ্যে ৮১ অনুচ্ছেদে বর্ণিত শপথ গ্রহণ এবং শপথপত্রে স্বাক্ষরদান করতে অসমর্থ হন : তবে শর্ত থাকে যে, অনুরূপ মেয়াদ অতিবাহিত হওয়ার আগে ক্ষেত্রমত নিবন্ধক এবং ব্যবস্থাপনা কমিটির সভাপতি যথাযথ কারণে তা বর্ধিত করতে পারবেন।

(৪) এ গঠনতন্ত্রের অধীনে নির্দিষ্ট কোন ব্যক্তির নিকট শপথ গ্রহণ আবশ্যিক হলে অনুরূপ ব্যক্তি যেরূপ ব্যক্তি ও স্থান নির্ধারণ করবেন, সেরূপ ব্যক্তির নিকট সেরূপ স্থানে শপথ গ্রহণ করা যাবে।

(৫) শপথ (বা ঘোষণা)-পাঠ বিষয়ে এতদ্ব্যতীত প্রচলিত সকল নিয়ম-নীতি অনুসৃত হবে।

৮১। শপথনামা বা ঘোষণাপত্র : ব্যবস্থাপনা কমিটি এবং অন্যান্য উপকমিটির সদস্যের ক্ষেত্রে নিবলিখিত ফরমে শপথ (বা ঘোষণা)-পাঠ পরিচালিত হবে :

“পরম করুণাময়ের নামে আমি, --- --- --- (প্রত্যেকের নিজ নিজ নাম উচ্চারণ করবেন) --- --- ---, বৃত্ত বহুমুখী সমবায় সমিতি লিমিটেডের --- --- --- (যিনি যে পদে নির্বাচিত হয়েছেন, তিনি সে পদের নাম উচ্চারণ করবেন) --- --- --- পদে নির্বাচিত হইয়া সশ্রদ্ধচিত্তে শপথ (বা দৃঢ়ভাবে ঘোষণা) করিতেছি যে, আমি যে পদের কর্তব্যভার গ্রহণ করিতে যাইতেছি, তাহা আইন-অনুযায়ী ও বিশ্বস্ততার সহিত পালন করিব;

আমি ব্যক্তি ও রাজনৈতিক স্বার্থের উর্ধ্বে থাকিয়া সমিতির আদর্শ, লক্ষ ও উদ্দেশ্য বাস্তবায়ন এবং উন্নয়ন করিব;

আমি বৃত্ত বহুমুখী সমবায় সমিতি লিমিটেডের গঠনতন্ত্রের রক্ষণ, সমর্থন ও নিরাপত্তাবিধান করিব;

আমি সমিতির স্বার্থ সংশ্লিষ্ট সকল গোপনীয়তা রক্ষা করিব;
আমি সমিতির সাধারণ পরিষদের বিশেষ করে ‘হিসাব-নিরীক্ষা’ সংক্রান্ত সকল সিদ্ধান্ত মানিয়া চলিব;
আমি মানবতা, দেশ, সমিতি এবং গঠনতন্ত্র পরিপন্থী কোন কার্যকলাপ করিব না;
আমি সমিতির সকল নিয়ম শৃঙ্খলা মানিয়া চলিব;
আমি ভীতি বা অনুগ্রহ, অনুরাগ বা বিরাগের বশবর্তী না হইয়া সদস্যগণের প্রতি আইন-অনুযায়ী যথাবিহিত আচরণ করিব;
এবং আমার কর্তব্য পালনকে ব্যক্তিগত স্বার্থের দ্বারা প্রভাবিত হইতে দিব না।”

৮২। ব্যবস্থাপনা কমিটির সভাপতির শপথ (বা ঘোষণা)-পাঠ : সহসভাপতি কর্তৃক, তাঁর অনুপস্থিতিতে/অপারগতায় পর্যায়ক্রমে সদস্য- ১, ২, ৩, ৪, ৫, ৬ অথবা ৭ কর্তৃক ৮১ অনুচ্ছেদে বর্ণিত ফরমে শপথ (বা ঘোষণা)-পাঠ পরিচালিত হবে।

৮৩। সভাপতি বাদে ব্যবস্থাপনা কমিটির অন্যান্য সদস্যের শপথ (বা ঘোষণা)-পাঠ : সভাপতি কর্তৃক ৮১ অনুচ্ছেদে বর্ণিত ফরমে শপথ (বা ঘোষণা)-পাঠ পরিচালিত হবে।

৮৪। উপকমিটিসমূহের সদস্যগণের শপথ (বা ঘোষণা)-পাঠ : সভাপতি কর্তৃক ৮১ অনুচ্ছেদে বর্ণিত ফরমে শপথ (বা ঘোষণা)-পাঠ পরিচালিত হবে। তবে উপকমিটিসমূহের সদস্যগণের শপথ (বা ঘোষণা)-পাঠ বাধ্যতামূলক নয়।
